



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

23.02.2018թ.

Ո Ր Ո Շ ՈՒ Մ

ՀՀ գնումների բողոքարկման խորհրդի թիվ ԳԲԽ-ԱՄ-2018/14

Հայաստանի Հանրապետության գնումների բողոքարկման խորհուրդը (այսուհետ նաև՝ խորհուրդ) քննելով «Լիկվոր» ՓԲԸ-ի կողմից 05.02.2018թ. ներկայացված բողոքը (այսուհետ նաև՝ ԳԲԽ-ԱՄ-2018/14 բողոք) և կից փաստաթղթերը, պարզեց հետևյալը.

1. «Լիկվոր» ՓԲԸ-ի ներկայացրած փաստերը, հիմնավորումները և պահանջը.

«Լիկվոր» ՓԲԸ-ն (այսուհետ նաև՝ Ընկերություն) ՀՀ գնումների բողոքարկման խորհրդին ներկայացրած 05.02.2018թ. բողոքով հայտնել է, որ վիճարկում է «Վանաձորի բժշկական կենտրոն» ՓԲԸ-ի (այսուհետ նաև՝ Պատվիրատու) կարիքների համար դեղորայքի ձեռքբերման նպատակով կազմակերպված «ՎԲԿ-ԳՀԱՊՁԲ-18/4» և «ՎԲԿ-ԳՀԱՊՁԲ-18/3» ծածկագրերով գնանշման հարցման ընթացակարգերի գնահատող հանձնաժողովների ընդունած որոշումները:

Ընկերությունը բողոքով հայտնել է, որ համաձայն «ՎԲԿ-ԳՀԱՊՁԲ-18/4» ծածկագրով ընթացակարգի գնահատող հանձնաժողովի նիստի թիվ 2 արձանագրության 5-րդ կետի և «ՎԲԿ-ԳՀԱՊՁԲ-18/3» ծածկագրով ընթացակարգի գնահատող հանձնաժողովի թիվ 2

արձանագրության 5-րդ կետի՝ բացման նիստի ընթացքում իրականացված գնահատման արդյունքում արձանագրվել է, որ «Լիկվոր» ՓԲԸ-ի ներկայացրած փաստաթղթերը, մասնավորապես հավելված 10-ը, չեն համապատասխանում հրավերով սահմանված պայմաններին: Մեջբերում արձանագրությունից. «Ներկայացված վճարման պահանջագրերում վճարողի ստորագրությունը բացակայում է»:

Ընկերությունը բողոքով նշել է, որ նշված երկու ընթացակարգերում հրավերի պահանջներին ոչ համապատասխան գնահատված փաստաթուղթը՝ հավելված 10-ը, ներկայացված է եղել էլեկտրոնային եղանակով, մեկ ֆայլով՝ բաղկացած երկու էջից, և առաջին էջի վրա տեսանելի է էլեկտրոնային թվային ստորագրությունը:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 12-րդ ենթակետի համաձայն՝ հրավերով նախատեսվում է նաև, որ տեղեկությունների (փաստաթղթերի) էլեկտրոնային եղանակով փոխանակման դեպքում դրանք ուղարկող տեղեկությունները (փաստաթղթերը) հաստատում է էլեկտրոնային թվային ստորագրությամբ, որի արտատպումը պետք է տեսանելի լինի փաստաթղթի վրա, իսկ հավաստագիրը՝ զետեղված «Նույնականացման քարտերի մասին» ՀՀ օրենքով սահմանված կարգով տրամադրված նույնականացման քարտում:

Ելնելով վերոգրյալից՝ գնման գործընթացը էլեկտրոնային եղանակով կազմակերպելու դեպքում, եթե մասնակցի կողմից փաստաթղթերը ներկայացվել են մեկ ֆայլով և դրանց էջերից մեկի վրա առկա է էլեկտրոնային թվային ստորագրությունը, ապա մասնակցի հայտը համարվում է հրավերով սահմանված պայմաններին համապատասխան:

«Լիկվոր» ՓԲԸ-ն բողոքով խնդրել է փոփոխել «ՎԲԿ-ԳՀԱՊՁԲ-18/4» և «ՎԲԿ-ԳՀԱՊՁԲ-18/3» ծածկագրերով գնանշման հարցման ընթացակարգերի գնահատող հանձնաժողովների ընդունած որոշումները և «Լիկվոր» ՓԲԸ-ի հայտը ճանաչել վավեր և հրավերի պահանջներին համապատասխան:

«Լիկվոր» ՓԲԸ-ն, պատշաճ ծանուցված լինելով Խորհրդի 09.02.2018թ. ժամը 11:00-ի նիստի վերաբերյալ, ապահովել է իր ներկայացուցիչների մասնակցությունը, ովքեր պնդել են բողոքով ներկայացված դիրքորոշումը:

2. «Վանաձորի բժշկական կենտրոն» ՓԲԸ-ի կողմից բողոքի վերաբերյալ ներկայացված փաստերը, հիմնավորումները և դիրքորոշումը.

«Վանաձորի բժշկական կենտրոն» ՓԲԸ-ն 08.02.2018թ. թիվ 879 գրությամբ հայտնել է, որ «Վանաձորի բժշկական կենտրոն» ՓԲԸ-ն 24.01.2018թ. և 29.01.2018թ. իրականացրել է դեղորայքի ձեռքբերման «ՎԲԿ-ԳՀԱՊՁԲ-18/3» և «ՎԲԿ-ԳՀԱՊՁԲ-18/4» ծածկագրերով գնանշման հարցման ընթացակարգեր:

Ընթացակարգերի հրավերները կազմված են համաձայն ՀՀ ֆինանսների նախարարի 24.05.2017թ. թիվ 238-Ա հրամանով հաստատված՝ հրավերի օրինակելի ձևի: Համաձայն հրավերի 8-րդ բաժնի «Հայտերի բացման, գնահատման և արդյունքների ամփոփման» 8.2 կետի՝ բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են: Ընդ որում՝ հայտերի բացման նիստում հանձնաժողովը մերժում է այն հայտերը, որոնցում բացակայում են գնային առաջարկը և (կամ) հայտի ապահովումը կամ դրանք ներկայացված են հրավերի պահանջներին անհամապատասխան:

Ընթացակարգերին «Լիկվոր» ՓԲԸ-ն հայտի ապահովումը (թիվ 10 հավելված) ներկայացրել է միակողմանի հաստատած հայտարարության՝ տուժանքի ձևով, որտեղ ընկերությունը հայտարարել է, որ որպես հայտի ապահովում Պատվիրատուին է ներկայացնում տուժանքի համաձայնությունը և կից վճարման պահանջագիրը՝ լրացված և հաստատված Ընկերության կողմից՝ համաձայն ՀՀ կենտրոնական բանկի հաստատած «Վճարահաշվարկային գործառնությունների կատարման ժամանակ կիրառվող փաստաթղթերի նվազագույն վավերապայմանների և դրանց լրացման կանոնների»: Նշված կանոններով վճարման պահանջագրում «շահառուի և վճարողի ստորագրությունները և վավերացումները» պարտադիր են:

Համաձայն հրավերով սահմանված վճարման պահանջագրի պարտադիր վավերապայմանների և լրացման կարգի 18ա. և 18բ. կետերի, վճարման պահանջագրում վճարողի ստորագրությունը և կնիքը պարտադիր է կամ ներկայացվում է վճարողի և վճարողին սպասարկող ֆինանսական կազմակերպության (մասնաճյուղի) միջև կնքված

համապատասխան պայմանագրի պատճենը: «Լիկվոր» ՓԲԸ-ի կողմից ներկայացված վճարման պահանջագրերում վճարողի ստորագրությունը բացակայում է և ներկայացված չէ վճարողի և վճարողին սպասարկող ֆինանսական կազմակերպության (մասնաճյուղի) միջև կնքված համապատասխան պայմանագրի պատճենը:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 32-րդ կետի 12-րդ ենթակետի համաձայն՝ հրավերով նախատեսվում է, որ տեղեկությունների էլեկտրոնային եղանակով փոխանակման դեպքում դրանք ուղարկողը տեղեկությունները հաստատում է էլեկտրոնային թվային ստորագրությամբ, որի արտատպումը պետք է տեսանելի լինի: Սակայն այս որոշմամբ նշված չէ այն հանգամանքը, որ մեկ փաստաթուղթ ստորագրելիս, ստորագրությունը վերաբերում է նաև հաջորդ փաստաթղթին:

Հաշվի առնելով նշված դրույթները և փաստերը՝ Պատվիրատուի կողմից «Լիկվոր» ՓԲԸ-ի հայտը մերժվել է:

«Վանաձորի բժշկական կենտրոն» ՓԲԸ-ն, պատշաճ ծանուցված լինելով Խորհրդի 09.02.2018թ. ժամը 11:00-ի նիստի վերաբերյալ, ապահովել է իր ներկայացուցիչների մասնակցությունը, ովքեր պնդել են վերոհիշյալ գրությամբ ներկայացված դիրքորոշումը:

3. ԳԲԽ-ԱՄ-2018/14 բողոքի քննության համար էական նշանակություն ունեցող փաստերը

ԳԲԽ-ԱՄ-2018/14 բողոքի քննության համար էական նշանակություն ունեն հետևյալ փաստերը՝

1. «Վանաձորի բժշկական կենտրոն» ՓԲԸ-ի կողմից «Վանաձորի բժշկական կենտրոն» ՓԲԸ-ի կարիքների համար դեղորայքի ձեռքբերման նպատակով էլեկտրոնային գնումների Armeps համակարգի միջոցով կազմակերպվել է «ՎԲԿ-ԳՀԱՊՁԲ-18/3» և «ՎԲԿ-ԳՀԱՊՁԲ-18/4» ծածկագրերով գնանշման հարցման ընթացակարգերը, որոնց մասնակցելու նպատակով «Լիկվոր» ՓԲԸ-ն հայտ է ներկայացրել:

2. «Լիկվոր» ՓԲԸ-ն «ՎԲԿ-ԳՀԱՊՁԲ-18/3» և «ՎԲԿ-ԳՀԱՊՁԲ-18/4» ծածկագրերով գնանշման հարցման ընթացակարգերի մասնակցության հայտերի թիվ 10 հավելվածով

ներկայացրել է հայտի ապահովում մեկ ֆայլի տեսքով, որի մեջ զետեղված է եղել տուժանքի մասին համաձայնագիրը և հայտի ապահովման վճարման պահանջագիրը:

3. Ընկերության կողմից էլեկտրոնային ստորագրությամբ հաստատվել են միայն «ՎԲԿ-ԳՀԱՊՁԲ-18/3» և «ՎԲԿ-ԳՀԱՊՁԲ-18/4» ծածկագրերով գնանշման հարցման ընթացակարգերի մասնակցության հայտի ապահովման տուժանքի մասին համաձայնագրերը:

4. «ՎԲԿ-ԳՀԱՊՁԲ-18/3» ծածկագրով ընթացակարգի գնահատող հանձնաժողովի 24.01.2018թ. ժամը 11:00-ի նիստի թիվ 2 արձանագրության 5-րդ կետի համաձայն՝ «Լիկվոր» ՓԲԸ-ն հայտի ապահովումը (հավելված թիվ 10) ներկայացրել է միակողմանի հաստատված հայտարարության՝ տուժանքի ձևով: Համաձայն վճարման պահանջագրի պարտադիր վավերապայմանների և լրացման կարգի 18ա և 18բ կետերի՝ վճարման պահանջագրում վճարողի ստորագրությունը և կնիքը պարտադիր է կամ ներկայացվում է վճարողի և վճարողին սպասարկող ֆինանսական կազմակերպության (մասնաճյուղի) միջև կնքված համապատասխան պայմանագրի պատճենը: Ներկայացված վճարման պահանջագրում վճարողի ստորագրությունը բացակայում է, և ներկայացված չէ վճարողին սպասարկող ֆինանսական կազմակերպության (մասնաճյուղի) միջև կնքված համապատասխան պայմանագրի պատճենը:

5. «ՎԲԿ-ԳՀԱՊՁԲ-18/4» ծածկագրով ընթացակարգի գնահատող հանձնաժողովի 29.01.2018թ. ժամը 11:00-ի թիվ 2 արձանագրության 5-րդ կետի համաձայն՝ «Լիկվոր» ՓԲԸ-ն հայտի ապահովումը (հավելված թիվ 10) ներկայացրել է միակողմանի հաստատված հայտարարության՝ տուժանքի ձևով: Համաձայն վճարման պահանջագրի պարտադիր վավերապայմանների և լրացման կարգի 18ա և 18բ կետերի՝ վճարման պահանջագրում վճարողի ստորագրությունը և կնիքը պարտադիր է կամ ներկայացվում է վճարողի և վճարողին սպասարկող ֆինանսական կազմակերպության (մասնաճյուղի) միջև կնքված համապատասխան պայմանագրի պատճենը: Ներկայացված վճարման պահանջագրում վճարողի ստորագրությունը բացակայում է և ներկայացված չէ վճարողին սպասարկող ֆինանսական կազմակերպության (մասնաճյուղի) միջև կնքված համապատասխան պայմանագրի պատճենը:

4. Խորհրդի հիմնավորումները և եզրահանգումը

Խորհուրդն, ուսումնասիրելով «Լիկվոր» ՓԲԸ-ի 05.02.2018թ. բողոքը, «Վանաձորի բժշկական կենտրոն» ՓԲԸ-ի 08.02.2018թ. թիվ 879 գրությունը և կից փաստաթղթերը, հայտնում է հետևյալը.

«Գնումների մասին» ՀՀ օրենքի 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

Օրենքի 32-րդ հոդվածի 1-ին մասի համաձայն՝ մասնակիցը հայտով՝ հրավերով սահմանված պահանջով ներկայացնում է հայտի ապահովում, որի չափը հավասար է հայտով առաջարկվող գնի մինչև հինգ տոկոսին: Հայտի ապահովումը ներկայացվում է միակողմանի հաստատված հայտարարության՝ տուժանքի կամ բանկային երաշխիքի կամ կանխիկ փողի ձևով: Կանխիկ փողի ձևով ներկայացված հայտի ապահովումը պահվում է լիազոր մարմնի անվամբ բացված գանձապետական հաշվում:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 32-րդ կետի 1-ին ենթակետի «դ» պարբերության համաձայն՝ հրավերով նախատեսվում է նաև, որ մասնակիցը հայտով ներկայացնում է հայտի ապահովում:

Կարգի 32-րդ կետի 12-րդ ենթակետի համաձայն՝ տեղեկությունների (փաստաթղթերի) էլեկտրոնային եղանակով փոխանակման դեպքում դրանք ուղարկողը տեղեկությունները (փաստաթղթերը) հաստատում է էլեկտրոնային թվային ստորագրությամբ, որի արտատպումը պետք է տեսանելի լինի փաստաթղթի վրա, իսկ հավանտագիրը՝ զետեղված «Նույնականացման քարտերի մասին» Հայաստանի Հանրապետության օրենքով սահմանված կարգով տրամադրված նույնականացման քարտում, կամ տեղեկությունները (փաստաթղթերը) ուղարկում է հաստատված բնօրինակ փաստաթղթից արտատպված (սկանավորված) տարբերակով: Գնման ընթացակարգն էլեկտրոնային գնումների համակարգի միջոցով կազմակերպված լինելու դեպքում Հայաստանի Հանրապետության ռեզիդենտ հանդիսացող մասնակիցները հայտում ներառվող՝ իրենց

կողմից հաստատվող փաստաթղթերը հաստատում են էլեկտրոնային թվային ստորագրությամբ, իսկ Հայաստանի Հանրապետության ռեզիդենտ չհանդիսացող մասնակիցները՝ այդ փաստաթղթերը ներկայացնում են հաստատված բնօրինակ փաստաթղթից արտատպված (սկանավորված) տարբերակով:

Կարգի 40-րդ կետի 4-րդ ենթակետի համաձայն՝ հայտերի բացման նիստում հանձնաժողովը մերժում է այն հայտերը, որոնցում բացակայում են գնային առաջարկը և (կամ) հայտի ապահովումը կամ եթե դրանք ներկայացված են հրավերի պահանջներին անհամապատասխան:

Կարգի 41-րդ կետի համաձայն՝ եթե հայտերի բացման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, բացառությամբ այն դեպքերի, երբ հայտում բացակայում է գնային առաջարկը կամ հայտի ապահովումը, կամ գնային առաջարկը, կամ հայտի ապահովումը ներկայացված է հրավերի պահանջներին անհամապատասխան, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով տեղեկացնում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

«Վանաձորի բժշկական կենտրոն» ՓԲԸ-ի կողմից «Վանաձորի բժշկական կենտրոն» ՓԲԸ-ի կարիքների համար դեղորայքի ձեռքբերման նպատակով կազմակերպվել է «ՎԲԿ-ԳՀԱՊՁԲ-18/3» և «ՎԲԿ-ԳՀԱՊՁԲ-18/4» ծածկագրերով գնանշման հարցման ընթացակարգեր:

Ընթացակարգերը կազմակերպվել են էլեկտրոնային գնումների Armeps համակարգի միջոցով և նախատեսվել է, որ մասնակիցները հայտը ներկայացնում են էլեկտրոնային եղանակով:

Ընթացակարգերի հրավերի ՄԱՍ I-ի 8-րդ կետի 8.19 ենթակետով սահմանվել է, որ տեղեկությունների (փաստաթղթերի) էլեկտրոնային եղանակով փոխանակման դեպքում մասնակիցը տեղեկությունները (փաստաթղթերը) հաստատում է էլեկտրոնային թվային ստորագրությամբ, որի արտատպումը պետք է տեսանելի լինի փաստաթղթի վրա, իսկ հավաստագիրը՝ զետեղված «Նույնականացման քարտերի մասին» Հայաստանի

Հանրապետության օրենքով սահմանված կարգով տրամադրված նույնականացման քարտում, կամ տեղեկությունները (փաստաթղթերը) ուղարկում է հաստատված բնօրինակ փաստաթղթից արտատպված (սկանավորված) տարբերակով: Հայաստանի Հանրապետության ռեզիդենտ հանդիսացող մասնակիցները հայտում ներառվող՝ իրենց կողմից հաստատվող փաստաթղթերը հաստատում են էլեկտրոնային թվային ստորագրությամբ, իսկ Հայաստանի Հանրապետության ռեզիդենտ չհանդիսացող մասնակիցները՝ այդ փաստաթղթերը ներկայացնում են հաստատված բնօրինակ փաստաթղթից արտատպված (սկանավորված) տարբերակով:

Ընթացակարգերին մասնակցության հայտ է ներկայացրել «Լիկվոր» ՓԲԸ-ն, որը հայտի թիվ 10 հավելվածը՝ հայտի ապահովումը ներկայացրել է մեկ ֆայլի տեսքով և էլեկտրոնային ստորագրությունը դրվել է միայն տուժանքի մասին համաձայնագրի վրա:

Ընկերության կողմից հայտի ապահովման տուժանքի մասին վճարման պահանջագրի վրա ստորագրություն չի դրվել:

Ընթացակարգերի հրավերի վճարման պահանջագրի պարտադիր վավերապայմանների և լրացման կարգի 18.ա կետի համաձայն՝ վճարման պահանջագրի «վճարողի ստորագրությունը» պարտադիր դաշտը լրացվում է վճարողի կողմից: Ոչ պարտադիր այս դաշտը չի լրացվում, եթե վճարողի և վճարողին սպասարկող ֆինանսական կազմակերպության (մասնաճյուղի) միջև կնքված պայմանագրով սահմանվել են այն դեպքերը, երբ վճարողը նախապես տալիս է իր համաձայնությունը/լիազորում է ֆինանսական կազմակերպությանը (մասնաճյուղին) կատարել վճարումներ՝ գանձելով այդ գումարը հաշվից: Ընդ որում վճարողի կողմից չստորագրվելու դեպքում կից ներկայացվում է նաև վճարողի և վճարողին սպասարկող ֆինանսական կազմակերպության (մասնաճյուղի) միջև կնքված համապատասխան պայմանագրի պատճենը:

Հրավերների վճարման պահանջագրի պարտադիր վավերապայմանների և լրացման կարգի 18.բ կետի համաձայն՝ «վճարողի կնիքը» պարտադիր դաշտը պարտադիր կնքվում է վճարողի կողմից՝ կնիքի առկայության դեպքում և ոչ պարտադիր է էլեկտրոնային թվային ստորագրությամբ հաստատվելու դեպքում:

«ՎԲԿ-ԳՀԱՊՁԲ-18/3» ծածկագրով ընթացակարգի գնահատող հանձնաժողովի 24.01.2018թ. ժամը 11:00-ի նիստի թիվ 2 արձանագրության և «ՎԲԿ-ԳՀԱՊՁԲ-18/4» ծածկագրով ընթացակարգի գնահատող հանձնաժողովի 29.01.2018թ. ժամը 11:00-ի թիվ 2 արձանագրության 5-րդ կետի համաձայն՝ «Լիկվոր» ՓԲԸ-ն հայտի ապահովումը (հավելված թիվ 10) ներկայացրել է միակողմանի հաստատված հայտարարության՝ տուժանքի ձևով: Համաձայն վճարման պահանջագրի պարտադիր վավերապայմանների և լրացման կարգի 18.ա և 18.բ կետերի՝ վճարման պահանջագրում վճարողի ստորագրությունը և կնիքը պարտադիր է կամ ներկայացվում է վճարողի և վճարողին սպասարկող ֆինանսական կազմակերպության (մասնաճյուղի) միջև կնքված համապատասխան պայմանագրի պատճենը: Ներկայացված վճարման պահանջագրում վճարողի ստորագրությունը բացակայում է և ներկայացված չէ վճարողին սպասարկող ֆինանսական կազմակերպության (մասնաճյուղի) միջև կնքված համապատասխան պայմանագրի պատճենը:

Այսպես, Կարգի 32-րդ կետի 12-րդ ենթակետի համաձայն՝ տեղեկությունների (փաստաթղթերի) էլեկտրոնային եղանակով փոխանակման դեպքում դրանք ուղարկող տեղեկությունները (փաստաթղթերը) հաստատում է էլեկտրոնային թվային ստորագրությամբ, որի արտատպումը պետք է տեսանելի լինի փաստաթղթի վրա, իսկ հավաստագիրը՝ զետեղված «Նույնականացման քարտերի մասին» Հայաստանի Հանրապետության օրենքով սահմանված կարգով տրամադրված նույնականացման քարտում:

«Էլեկտրոնային փաստաթղթի և էլեկտրոնային թվային ստորագրության մասին» ՀՀ օրենքի 2-րդ հոդվածի համաձայն՝ էլեկտրոնային փաստաթուղթը՝ տեղեկություն է գրանցված նյութական կրիչի վրա էլեկտրոնային եղանակով, վավերացված էլեկտրոնային թվային ստորագրությամբ:

Խորհուրդը գտնում է, որ գնման գործընթացը էլեկտրոնային եղանակով կազմակերպելու դեպքում, եթե մասնակցի կողմից փաստաթղթերը ներկայացվել են մեկ ֆայլով և դրանց էջերից մեկի վրա առկա է էլեկտրոնային թվային ստորագրությունը, ապա մասնակցի հայտը նշված հիմքով ենթակա չէ մերժման:

Ինչ վերաբերում է կնիքի առկայության հարցին, ապա «ՎԲԿ-ԳՀԱՊՁԲ-18/3» և «ՎԲԿ-ԳՀԱՊՁԲ-18/4» ծածկագրերով գնանշման հարցման ընթացակարգերի հրավերների վճարման պահանջագրի պարտադիր վավերապայմանների և լրացման կարգի 18.բ կետի համաձայն՝ վճարման պահանջագրում վճարողի կնիքի առկայությունը պարտադիր չէ այն էլեկտրոնային թվային ստորագրությամբ հաստատվելու դեպքում:

ՀՀ ֆինանսների նախարարությունը, որպես «Գնումների մասին» ՀՀ օրենքով նախատեսված լիազորված մարմին, թե պատվիրատուներին և թե մասնակիցներին ուղղված մի շարք պարզաբանումներում նույնպես արտահայտել է վերը նշված դիրքորոշումը:

Այսպիսով, հաշվի առնելով վերոգրյալը, Խորհուրդը գտնում է, որ «Լիկվոր» ՓԲԸ-ի կողմից ներկայացված հայտի ապահովման միայն տուժանքի մասին համաձայնագրի ստորագրված լինելը չի կարող դիտարկվել որպես վերջինիս հայտը հրավերի պահանջներին անհամապատասխան գնահատելու հիմք, քանի որ Ընկերության կողմից հայտի ապահովումը՝ տուժանքի մասին համաձայնագիրը և կից վճարման պահանջագիրը ներկայացվել են էլեկտրոնային մեկ ֆայլով, որը հաստատվել է էլեկտրոնային թվային ստորագրությամբ, ուստի Խորհուրդը գտնում է, որ «Լիկվոր» ՓԲԸ-ի բողոքը հիմնավոր է և ենթակա է բավարարման:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների բողոքարկման խորհուրդը՝

Ո Ր Ո Շ Ե Ց

• «Լիկվոր» ՓԲԸ-ի կողմից ՀՀ գնումների բողոքարկման խորհրդին 05.02.2018թ. ներկայացված բողոքը բավարարել.

1. Փոփոխել «Վանաձորի բժշկական կենտրոն» ՓԲԸ-ի կարիքների համար դեղորայքի ձեռքբերման նպատակով կազմակերպված «ՎԲԿ-ԳՀԱՊՁԲ-18/3» ծածկագրով գնանշման հարցման ընթացակարգի գնահատող հանձնաժողովի 24.01.2018թ. ժամը 11:00-ի նիստի թիվ 2 արձանագրության 5-րդ կետը և «Լիկվոր» ՓԲԸ-ի հայտը՝ հայտի ապահովման մասով գնահատել հրավերի պահանջներին համապատասխանող.

2. Փոփոխել «Վանաձորի բժշկական կենտրոն» ՓԲԸ-ի կարիքների համար դեղորայքի ձեռքբերման նպատակով կազմակերպված «ՎԲԿ-ԳՀԱՊՁԲ-18/4» ծածկագրով ընթացակարգի գնահատող հանձնաժողովի 29.01.2018թ. ժամը 11:00-ի թիվ 2 արձանագրության 5-րդ կետը և «Լիկվոր» ՓԲԸ-ի հայտը՝ հայտի ապահովման մասով գնահատել հրավերի պահանջներին համապատասխանող:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

**ՀՀ գնումների բողոքարկման
խորհրդի անդամ՝**



ՄԿԵՐ ԱՆԱՆՅԱՆ